



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

Mexican Open: Nadal-i Norrie koka title 91buba benogo

Yogi sorkari UP nung sentsüh 40% bendenloktsüogo: P Chidambaram



VOL. XIX NO. 136 (ADOK 136) DIMAPUR TENTONÜ (MONDAY) TSÜKLAI (FEBRUARY) 28, 2022 ₹ 5.00

Nagaland HFW-i IPPI campaign tenzükogo

Kohima, February 27, 2022 (TYO): Nagaland Health and Family Welfare Department (HFW)-i Deobarnü National Intensified Pulse Polio Immunization (IPPI) programme tenzükogo.

HFW Principal Director Dr Neikhrielie Khimiao-i Urban Primary Health Centre (UPHC) Seikhazou, Kohima nung polio drop mezüngbuba jemdakja iba sentong tenzüksü.

"Nagaland nung COVID-19 anema raradang mapang tamajung ajuruogo. Iba virus ya tila ka dang saka alima ajungai telangzüba menguteter" ta Dr Khimiao-i ashi.

"Alima nung polio virus anema mozü agütsüba maparen tenzükba

ajanga nisung million aika taküm nung temelnsi bentsür aruogo. India nung polio samadaksüogo saka asen kidanger linüktem nung polio aliba ajanga asenok zübazüba lema malitsüla" ta pai metetdaksü.

Deobarnü state ajungalen polio booths lapoktsü aser Hombar nungi kilen shia sema senzüksü, ta Chief Medical Office Kohima Dr Vezokholu Theyo-ia ashi.

"Health-workers 9,906 den supervisors 441-i booths 2206 nung immunization drive agir. Iba mapang tanur arishi 0-5 tsüngda 1,51,458 nem polio mozü jemdaksütsü" ta State Immunization Officer Dr Ritu Thurr-ia ashi.

Manipur nung JD-U candidate dak injang khaloktsü

Imphal, February 27, 2022 (Agencies): Manipur nung assembly election mezüngbuba shilem agütsü anogo ana lia yasüing Janata Dal-United (JD-U) candidate Wahengbam Rojit Singh dak injang khaloktsü.

Rojit-i Imphal East district kübok Kshetrigao constituency nungi tokteper.

Honibar aonung 11:30 ako meta Naharup Makhapat nung Rojit-i pa pusemer kar den ajurutepdang pa dak injang khaloktsü, ta police-i ashi.

Rojit-i nisung ka den jembishinüa lia mejangjaba nisung kar scooter ka nung arur pa dak injang agi akha.

Arishi küm 42 tain Rojit teku tachijilen injang agi yiru aser Imphal nung Raj Medicity nung anepalu aser pa lendong nungi jenbuogo ta osang angazüker.


Iba tatalokba atema police-i FIR ka benokogo.

February 28, 2022 nü election mezüngbuba shilem nung Kshetrigao constituency nunga polling asütsü.

Russia-Ukraine tsüngda yimjung olemtep alitsü akok



Volodymyr Zelensky



Vladimir Putin

New Delhi, February 27, 2022 (Agencies): Ukraine-i Russia den yimjung olemtep alitsü molunga agizüker ta Ukraine President Volodymyr Zelensky-i Deobarnü metetdaksü.

Belarus President Alexander Lukashenko den phone ajanga jembidang Zelensky-i Ukraine aser Russia nungi teshimtet teloktem tsüngda senden ka amentsü molunga agizük.

Iba sendenji Ukraine-Belarus artsü nung Pripyat River anasa amentsü.

"Ukraine teshimtet teloki Russia teshimtet telok den tatemzükba kecha melii ajuruteptsü molungogo" ta Zelensky-isa metetdaksü.

Ukraine nung senzüsenbongdang, olemtepa mapang aser linüki meyipa mao tashi Belarus nung anendaka aliba planes, helicopters aser missiles

ajak ali nung dang alitsü ta Belarus President Lukashenko-i nangzükogo, ta paisa ashi.

Külen, Russia President Vladimir Putin-i nuclear deterrent forces renema alitsü tetuyuba ka agütsüogo.

Russia-i Ukraine amakba anema West-i noktaker aser iba nung ajemdaker Putin-i Russian defense minister aser chief of the military's General Staff dang nuclear deterrent forces renema alitsü tuyuogo.

Russia den olemtep alidang Ukraine-i tila makümtsü aser President Vladimir Putin-i Russian nuclear forces renema alitsü tuyuba aitsür, ta Ukraine foreign minister Dmytro Kuleba-i ashi.

"Ukraine-i Russia nem ali inch ka danga magütsütsü. Onoki bendanga magütsütsü, onoki Russia tsüngdang tila makümtsü"

ta Dmytro Kuleba-i ashi.

Russia sepaitemi Ukraine nung yimti tulutiba rongnung tanabuba Kharkiv telungi iogo. Kharkiv yimdong nung khateper ta ketdangsürtemi ashi.

Budapest nungi India nung 240 mener tayimtsü ka Deobarnep New Delhi tonga aruogo. Iba tayimtsü marudang tanep aneppongi Ukraine nung anendaka alir India nung 250 tashi Romania yimtiba Bucharest nungi Delhi airport tonga aru.

Tanep Ukraine yimtiba Kyiv nung bomb tesashi ana apokba angashiogo.

Maneni, United Nations-i civilian 240 shi ka asüba osang metetdaksüogo. Iba nung Brihostibar nungi Russia-i Ukraine amakdang tasür nisung 64 densema lir.

Russia-i Lithuania, Latvia, Estonia aser Slovenia nungi aruba tayimtsütem atema airspace shibangogo.

Russia President Vladimir Putin-i nuclear arms dena deterrence forces renema atatsü tetuyuba agütsüba ya magizüker ta US Ambassador to the United Nations Linda Thomas-Greenfield-i tanü metetdaksü.

"President Putin-i iba rara tuluba küm daksütsü meranger aser iba ya magizüker. Asenoki pai inyakba mapatem akokba tashi azüoktsü merangtsüla" ta Thomas-Greenfield-i ashi.

Nagaland sorkari Ukraine nung aliba Naga nung osang metetnür

Kohima, February 27, 2022 (TYO): Nagaland sorkari Ukraine nung jenoka alirtem aser iba linük nungi meyipa arunürtem lira osang agüjang ta metetdaksüogo.

"Ukraine nung Nagaland nungi nisung kar danga anendaka lira aser tensa majungba agi kidangi meyipa arunüra helpline numbers - 0370-2291122/2291120 mesüra seoc.nsdma@gmail.com aser sdma.nagaland@gmail.com nung email ajanga osang agütsütsü metetdaksür" ta

Nagaland State Disaster Management Authority (NSDMA), Home Department-i ashi.

Iba osang ya Nagaland Home Commissioner Abhijit Sinha ajanga sangoktsü.

Tang tashi nung Ukraine nung Naga nung aliba osang kecha mali aser iba jagi maparen inyaksü atema advisory agütsür, ta osang ka ajanga ashi.

Külen, Nagaland Deputy Chief Minister, Y. Patton-ia Nagaland nungi nisung kar dang

Ukraine nung oa lira, mesüra Ukraine toktsür tanga linüktem nung jenoka alirtem yaritsü metetdaksüogo.

Ministry of External Affairs aser bendang linüktem nung Embassy ketdangsürtem den jembitepa parnok anir arutsü ta Y Patton-i ashi.

Tsüraburtem aser kinungertemi pa dang emesüra Naga Students' Federation (NSF) office ajanga osang yoktsü atema Deputy CM-isa metetdaksü.

COVID-19 Nagaland: 1 dak putet, 10 taneptsü angu

Kohima, February 27, 2022 (TYO): Nagaland nung Deobarnü nisung 1 dak COVID-19 putet aser 10 taneptsü angu.

Tanü Mokokchung nung nisung ka dak COVID-19 putet. Külen, taneptsü angurtemji Dimapur nung nisung 7 aser Kohima nung 3 lir.

Nisung 35,402 rongnungi 33,010 taneptsü nguogo aser ibaji taneptsü angur 93.36% lir. Nagaland nung nisung 119 anepaludar saka parnok 107

dakbo shirangba yimya mali.

February 26 tashi nung arishi küm 15 nungi 18 tsüngda tainyinlong 79,083 nem COVID-19 vaccine agütsüogo.

Kasa mapang arishi küm 18 ser temapur nisung 8,13,859 nem COVID-19 vaccine indang dose 14,64,661 agütsüogo.

Vaccine agirtemji frontline workers 61,041, healthcare workers 16,017, arishi küm 45 ser temapur 2,20,659 aser arishi küm 60 ser temapur 5,16,142 lir.

Vaccine agirtem rongnungi nisung 6,28,724-i sose anaprong agiogo. Parnokji frontline workers 48,905, healthcare workers 13,604, arishi küm 45 ser temapur 1,87,730 aser arishi küm 60 ser temapur 3,78,484 lir.

Külen, nisung 22,078 nem precautionary dose agütsüogo. Parnokji health care workers 3,327, frontline workers 16,747 aser arishi küm 60 ser temapur 2,004 lir.

OFFICE OF THE
LANGPANGKONG TZÜKONG MUNGDAW
H.Q. Chuchuyimlang - 798614
Dist. Mokokchung, Nagaland.
ESTD. 1933

Ref. No..... Date.....

SANGDONGER

Langpangkong Tzükong Mungdang nükjidong "Lenmang aser Telongjem" nung ajemdaker Langpangkong litsü nung Lenmang kechisa yangludir nübur ajak ajangzüksü meji akangalonga yanglutsu nukla nung Langpangkong litsü ya Tax free zone ta sangdongba den külemi Tzükong Mungdang Langpangkong Tzükong Mungdang Road Co-ordination Committee (LTM RCC) ta nungtetsa lenmang yangluba reprangtsu nungloktsü. Tzükong nung koba lenmangsa yangludaki LTM RCC-i niken belem jendi arema item maparen reprangba den külemi nuburi meteta alitsü atema jelia Langpangkong Tzükong ya tax free zone ta Dated 20th Nov 2021 & 18th January 2022 anogotem nung osang kaket balala nung Sangtongogo. Aser iba lemet nung tanü tashi akangakanga nokdaka inyaka arudar. Langpangkong telongzük nung dang koba Changtongya to Dikhu tashi nung Nitin Sai Construction-i yangludagi iba mapa nung memetetba nisung kari 27th February 2022 anogo nung takangba kar agüja Machineries aser Gari sabi (keys) meshia bener ao, aser parnok den tongtepretebstü asoshi contact number ka agütsür aoba osang LTM RCC dangi aru nung. LTM RCC, LKM RCC & LTM office rondak senden ka 27-02-2022 anogo nung mena jembiteber agüja aliba contact number nung call asü, saka switch off sür liasü. Iba maparen tajungtiba nung lemet agütsü lenmang mongutet nung senden ajanga lemetetba yamai sangtonger. 27-02-22 Nitin Sai Construction mapa nung kechi timtem atalokogo LTM-i khukhua aitsür aser shirnoki sabi (Keys) bener oa ali aji 2nd March 2022 anogo tashi nung LTM Office tongisütsü metetdaksür, iba anogo nungji metongtsüra LTM-i tatem tashi bushitsü.

Sd/- (MARSANEN IMSONG) President, LTM

(TEMSUWATI LRK) Convenor, LTM RCC.

Sd/- (TIAKUMZUK PONGEN) Convenor, LKM RCC

Sd/- (LIMASANGWA) Member secretary, LTM RCC.

Mokokchung district nung IPPI sentong takok ngua agi



February 27, 2022 nü Imlong Palace , Mokokchung nung IPPI 2022 sentong aliba noksa nung angur

Dimapur, Tsüklai/Feb. 27 (TYO): Linük ajunga den külemi Mokokchung nunga IPPI 2022 sentong Imlong Palace nung February 27, 2022 nü agia liasü.

Chief Medical Officer, Mokokchung indang office nungi sangdong ka ajanga ashiba agi, iba sentong ya Shashank Pratap Singh, IAS, Addl. Deputy Commissioner Mokokchung ajanga tenzükja mezüngbuba polio drop agüja liasü.

Iba sentong nung pai o tatsüka jembidang, arishi küm 0-5 tanur ajak nem polio drops (tzüjang) ana jemdaktsüsüla, ta ashi.

India ya polio maliba linük ka lir, saka kidanger linüktem nungi Polio Virus menar arutsü ana-

meta nung lir, kechiaser item linüktem nung polio tashidak kanga pulua lir, ta pai ashi.

District nung IPPI takok ngua tenzükba atema pai Department of Health & Family Welfare aser sendaktepa aliba department tem nem tenüngsang agüja liasü.

Dr. Aonungdok, Dy. CMO ajanga sentong nung jembiba mapang, 1995 küm WHO indang Global Polio Eradication sentong sülen anidaka India nunga IPPI ya Universal Immunization sentong ka ama tenzükba liasü aser 2014 küm India nung polio tashidak mali ta sangdonga liasü, kechiaser India nung polio tashidak tatemsabuba ya 2011 küm jangjateta liasü, ta ashi.

Iba sentong nung Dr. Ayangla Saku DPO (UIP & RCH) menden liasü aser lai ketdangsürtem aser tsüraburtem pela agizükba o jembi aser taküm district nung arishi küm 0-5 tsüngta tanur 7406 nem iba mozü agütsüsü sentong lir, koba polio booth 224 ajanga awajemtsü, ta ashi.

Iba sentong nung Dr. Kika Longkumer, Joint Director Directorate of Health & Family Welfare, District Administration nungi ketdangsürtem, Chief Medical Officer Office & IMDH nungi ketdangsürtem, Department of Social Welfare & School Education, Red Cross Society aser Rotary Club Mokokchung nungi ketdangsürtem arua dena liasü.

Chuchuyimpang nung gari anishirtem shisatokden aka



Zulumanen

Sentiyanger

Mokokchung, February 27: Chuchuyimpang Baptist Arogoi achaayanga February 26 nü Chuchuyimpang yimtak aser temeket nung alir Gari anishir nem tesayuba sentong ka kaogo.

Iba sentong nung Wb.Sentiyanger 2nd OC Traffic Control Mokokchung-i Yim aser Arogoi gari anishirtem nem iba ama tesayuba agutsüba sentong ya mangashidangba mapa tajung ka lir, iba ya nüburtem asoshi kanga dang temoatsü tulu lir.Iba ya tetenzük ka sür Yim aser Arogoi balalai achayanga karabang nüburtem asoshi tangazükba tulu asütsüta tepelaba shisem.

2nd OC Traffic Control Mokokchung-i "Gari Ka Ayuba, Amshiyim aser Temzüng" onük nung ajemdaker jembidang , Gari jagi nungtak aika ataloktsür, gari ka akaba ajanga

nübur tenzükba mapa-a inyakteter aser kibonga mesüa liteter, aji asünung iba temoatsüji meteta gari kanga dang anepalua amshitsüla ta ashi.

Sentiyanger-isa gari ka alir kelen gari kakat shitak maliba ajanga gariji ne nungtak nung mamshitetra aji takoksa tulu, anungji mapang shitak amshia kakat renema ayutsüla.Gari kibur aser gari anishir kaji gari ajanga timtem mesüra ajurutsüsa masü saka tajangzük ngutettsüsa gariji ayutsüla aser amshitsülata ashi.

Soyim Driving School Kibur Sb.Zülumanen ajanga kasa sentong nung "Driver Ka Gari Anishiba Yim" onük nung ajemdaker jembidang pai nungtak tongtipang tapu jenti liaka gari mapusodang gari jung junga

reprangshirang(check)

apusotsüla,gari anishir kati teti dang pei mapang aser nungtak dang bilema gari amshira aiben lendong ajurutsü aser aji takoksa tulu asütsüta ashi.

Gari timi manishiba, gari timi anena mayu, signal aser horn mapang shitak nung magutsüba ajanga asen sasa asen lendong ajurubaji toktsür tangar nem timtem agutsür aser tangar lendongi idaktsür, anungji gari anishiba mapang nung gari anishiba yimya shitak bentshia anitsüla. Paisa gari nung totzü tapu balala aika inoker, mapang shitak totzü tapu balalaji inokra gariji tim metemdaktsür aser gari anishir aser

gari kiburjia anisüngzük, anungji gariji timi mapa shitak amshia anepalutsü nungtaker ta shisem.

Iba sentong nung Rev.I.Wati Imsong Pastor ajanga tepela O jembi aser Wt. Onentila, Kr. Imsümongla, Wb. Imtjungshi aser Wb.Katemmeren teloki ken atenba den Wb.L.Chuba Deacon aser Wt.S.Amongla Asso.Pastor(w) tenati tetenzü aser tatembang sarasadem agiba den Wb.Aso.Imsong-I sentong ketdangsüa ania sentong agiba ajanga gari anishirtem tangazükba tulu ngua sentong kanga tobur jung junga takok ngua agia liasü.

Samagra Shiksha Nagaland ajanga SMC & SMDC Members training agütsüsü

Kohima, Tsüklai/Feb. 27 (TYO): Samagra Shiksha Nagaland ajanga ERBCs ajunga nung February 28, 2022 nungi March 12, 2022 tashi SMC & SMDC Training and Meeting Programme kübok School Management Committee (SMC) and School Management and Development

Committee (SMDC) Members training agütsüsü.

Temsunaro Aier, State Mission Director Samagra Shiksha ajanga ashiba agi, iba training sentong nungya SMC/SMDC shia nungi züngsem asem-sem adentsü.

Unified District Information System for School Education

(UDISE) exercise nung data shidak bendentsü nung rangloker iba training ya agütsüsü, kechiaser State nung school tem indang jenjang aser tia shidakba metettsü aser angatettsü atema school temi data bendenba ya kanga tongtipang lir.

(Maneni tapak 3 nung...)

T.R. Zeliang-i Dr. Kakheto Zhimomi asükhu lemsatsep

Dimapur, Tsüklai/Feb. 27 (TYO): Mapang talangka shiranga arur Honibarnü CIHSR Dimapur nung Dr. Kakheto Zhimomi asüba osang angashia mang ayimer, ta T.R. Zeliang-i sangdong ka nung ashi.

Pa yimten yimsüsüba nung tetsüng ajemokba mapang nungi ni pa meteta liasü aser 8 buba Nagaland Legislative Assembly nunga külemi inyaka liasü. Pa ya züngzünga inyakba nisung ka liasü, aser pa asüba ajanga tawa tuluka yutsür, ta taoba Nagaland chief minister-i ashi.

Pa ya temolung ajak pokba jembiba nisung ka liasü aser arendaka melie jembi aser Naga nungertiptema alitsü asoshi teti bilema liasü.

Ano pa Western Sumi Hoho nung tir inyakdanga küna tesendaktep tajung liasü. Küna mapang shia ajurutepa yimjung bener arutsü jembi aser ano Zeliang yimtsüngtem aser Western Sumi yimtsüngtem tsüngta mepetmesü adoka aliba angateteptsü asoshi teti jembia liasü, ta Zeliang-i ashi.


Zeliangrong Baudi aser danga Civil Society Organisation tem den senden mena kin ana tsüngta yimjungtesunep nung alitsü atema jembishinütsü asoshi Jalukie Town-i pa anaben arua liasü.

Pa dak yimya tajung aliba ajanga ajaki pa sapua liasü. Tia maka pa WSH indang tir ama inyaka lia nisung asem takum samaba meshi pai iba menden yutsü, koba asenoki aiben mongudang aser ibaji ajanga pa dak ochi molungsentsü aliba sayur, ta ashi.

Naga nungertiptema asoshi pai tatishitsü tajung sayuba atema ni pa dak kanga sakloka liasü.

Ajaki pa menungratsü aser pa dak sempet tajung aliba bilemettsü. Tang iba ama mangyim tia nung aliba mapang ni aser ozü kibongi mangyimer kibong den asükhu lemsatsep. Tulusang Tsüngremi tashi agüja temolung sunepjang ta sarasademtsür. Asür tanüla teti tatem maka tetunep nung anisügzükjang, ta T.R. Zeliang-isa ashi.

Ao ABCD Nüngjalok shitipak ka saya



Changtongya, Tsüklai/Feb. 27 (TYO): Aor tetsü oshi wazüka ayutsü nükjidong nung February 23, 2022 anogo Arju Tsuki-Bachelors' Dormitory telok ajanga "Ao ABCD Nüngjalok" saya liasü.

Iba dak sentakba nung nüngja-kojattem, ola-osü koma adoktsü (transcription), itemjia enoka lir. Iba shitipak sayatsü asoshi alakteta jaoker shinga mejaok.

Tamalena iba telok yagi Nüngo Reju aser Arem Süngjanglijang lu lapokdanga alakteta jaoker shinga mejaok aser tarutsü nunga kasajisa bentshia aotsü, kechiba süra iba telok ya meshimetsüba/sarasajiba nungi pila alitsü tangatetba telok ka lir, ta sangdong ka ajanga ashi.

Iba shitipak ya mapa küma adoktetsü asoshi Ao Senden Literature Board (ASLB) ajanga temelenshitsu ajak melenshitsu temelaba agütsüba asoshi pelar, ta sangdong ajanga ashi. Iba shitipak nung Fifi ozü,

Quishinaro aser X-ray, item ya ASLB ajanga adokba Ao Textbook (2009) kakettek nung aliba ama adoka lir.

Item dak alaka iba Ao ABCD Nüngjalok shitipak ajanga talisa tilatanurtem Ao oshi angazüktsüren nung kanga yaritsü imlar, ta iba shitipak adoker telok nung Sentirenba (Founder & Director) ajanga metetdaksü.

Iba shitipak ya item tesem nung angutsü:

Kohima:

Longkümer Shop, Lower Jail Colony, Woodland handicraft, State Library kimajem (opposite).

Chumukedima:

Yano Stationary, Beituo Complex, 2nd gate junction. Yano Solution, 7th Mile Junction.

Dimapur:

Modern Book Depot. OM Book Centre, **Mokokchung:** Balaka Yokya, I.M. Road. Unique Bakery kimajem. Classmate, Changtongya Town.



Tripura sorkari Agar Trade Centre yanglutsü atema Rs 15 crore aser Sepahijala Wildlife Sanctuary ajungkettsü atema Rs 25 crore lezmüksüogo ta Chief Secretary Kumar Alok-i metetdaksü. "Item mapatong ajanga state nung tourism aser Agar shishilembaba ajungkettsü. Forest Department ajanga item mapatong ana inyaksü" ta Kumar Alok-i ashi. Tripura nung Agar süngdong lakh 50 tema lir aser state sorkari Tripura Agar Wood Policy 2021 tenzükogo. Iba ajanga 2025 tashi nung Agar lu anasü agi teimba akümtsü aser state sorkari taruba küm ishika tsüngda Agar sector nung Rs 2000 crore business imlar. (Agartala, February 27)

Manipur nung Assembly election mezüngbuba shilem agitsü

Imphal, February 27, 2022 (Agencies): Lendong atalokaka Hombarnü (28.02.2022) Manipur Assembly elections indang mezüngbuba shilem agitsü asoshi renema lir.

Mezüngbuba shilem nung Assembly constituency 38 nung polling asütsü. Iba nung tetsür 15 densema candidate ajak agi 173 lir.

Polling agitsü aliba Assembly constituency 38 nung Central Armed Police Forces personnel aika yokogo. Kasa mapang polling maparen achaayanger 9,895 shi parnok nem lezmüksüba polling station 1, 721 tongogo, ta Election ktdangsertemi ashi.

Covid-19 dak sendakba nung tekümdangtsü mera agia iba Assembly polls agitsü mechi nung polling station ajak sanitize süogo aser ajaki facemask aser sanitizer amshiba densema tanga meratem nung anidaksü asoshi maparen achaayangogo.

Mezüng shilem nung tetsür voter 6, 29,276 densema vote enoktsür 12, 22,713 lir.

Assembly election agitsü aliba state nung tesüiba anogo ishika nungi lendong balala atalokogo. Item lendong nung nisung ana asü, candidate ka aser candidate ka tebu densema nisung kar yirua liasü.

Political party temi parnok nüboyim sentong nung terenlok, militancy, özüng alema temesepeba mozü shibelenba,

Armed Forces (Special Power) Act, 1958 (AFSPA) agientsü, women empowerment, mapa manguba tebilemetsü (unemployment) aser oschimashiba onüktem nung jemiogo.

Hombarnü nung Chief Minister N. Biren Singh, cabinet minister Thongam Biswajit Singh, NPP candidate aser Deputy Chief Minister Yumnam Joykumar Singh, BJP lenir Thokchom Satyabrata Singh, Congress lenir Ratankumar Singh, Lokeshwar Singh, Saratchandra Singh, MLA Akoijam Mirabai Devi nung tokteper.

Taoba mapang Additional Superintendent of Police (Headquarters) inyakba Janata Dal (United) candidate Thounaojam Brinda-i Yaiskul constituency nungi tokteptsü.

2017 küm Assembly election nung BJP-i menden 21 ngutet aser parnoki NPP MLA pezü aser Naga People's Front (NPF) MLA pezü teyari agia teloktep sorkar ka tenteta liasü.

Ajisüaka, tan Assembly election nung BJP, NPP aser NPF telok balala tokteptsü aser iba atema pei pei candidate shimogo.

Congress-i küm 15 tashi atongtepa (2002-2017) Manipur state nung yimsü asü aser 2017 election nung menden 28 nguteta single largest party takok angu. Parnoki Left party 4 aser

Janata Dal-Secular den pre-poll alliance yangluba sülen tan election nung Manipur Progressive Secular Alliance (MPSA) tentetogo.

Manipur Assembly election indang tanabuba shilem ya March 05, 2022 nü menden 22 nung agitsü. Iba sülen March 10, 2022 nü votes azüngtsü.

BOMB LENDONG NUNG NISUNG 2 ASÜ:

Manipur nung election agitsü anogo ana lia Honibar aonung Churachandpur district kübok ki ka nung bomb apokba lendong nung tanur ka densema nisung ana asü aser nisung pungo yirua liasü.

Gangpimual yimtsüng nung bomb apokba ya mortar ajanga ta bushitetogo.

"Iba bomb lendong nung tanur ka densema nisung 7 kanga mejungi yiru aser parnok mozüki kati anir ao. Idakji arishi küm 6 tain Mangminlal aser arishi küm 22 tain Langinsang asü" ta district police ktdangsür kati ashi.

Iba bomb lendong atalokba tesemi police tonga ao. Iba maparen nung dena alirtem aputsü asoshi police-i bushisingdang tenzükogo.

January 08, 2022 nü Manipur assembly election atema anogotem sangdongba sülen State nung atalokba lendong tulu rongnung Honibar aonung bomb apokba lendong ya liasü.

Ukraine nungi Assam nunger kaketshir 4 India tonga aruogo

Guwahati, February 27, 2022 (Agencies): Assam nungi kaketshir pezü tashi tangaleni mouteti Ukraine nung anendaka aser Indira Gandhi International Airport nung anenzük.

"Onoki özü kaketshirtem Tanmayee aser Siya na pelashishia agizüker, tenaprongla Ukraine nungi anitetogo aser Mumbai tonga aruogo. Assam Bhawan ktdangsürtemi parnok agizük, parnok anenzüksü aser Guwahati tashi arutsü atema onoki maparen ajak achaayangdar. Item kaketshir nem nungdakba teyari ajak agütsütsü asoshi team-i inyaksü," ta Assam Chief Minister Himanta Biswa Sarma-i Twitter nung lemsatap.

"Bongshar Sualkuchi nungi Himashree Kakati aser Maligaon Guwahati nungi Daisy Basumatary, shirnok UZHNU Ukraine nung medicine study asür, tenaprongla MEA ajanga

Ukraine nungi tena anitetogo aser tanep (Deobarnü) 9:15 ako meta tena Delhi tonga aruba mapang Assam Bhawan, Delhi nungi ktdangsürtemi tena agizük" ta CM Sarma-sa metetdaksü.

Ukraine nung anendaka alir India nunger senso aser kaketshir ajak India-i meyipa anir arutsü asoshi tim ktdangsürtemi meranga inyakdar.

Ukraine nung anendaka alir kaketshirtem pei talidak (State) tongtsütsü asoshi Sorkari airport tem nung Help Desk amenoktsüogo.

Sorkarisa, Ukraine nungi arur India nunger kaketshirtem atema angati bus service renemtsüogo.

Assam nungi kaketshir 100 shi tangaleni mouteti Ukraine nung anendaka lir.

Ukraine nung India nunger senso 20,000 shi lir ta asadangtetba osang metetdaksüogo.

Ozüng alema railway tickets ayoker 3 apu



Guwahati, February 27, 2022 (Agencies): Honibarnü Northeast Frontier Railway indang Railway Protection Force (RPF)-i özüng alema railway tickets ayoker nisung asem apu.

Osang kar angazükba nung ajemdaker parnoki özüng alema railway tickets ayokba atema dokan asem mita ao ta RPF-i ashi.

Iba mapang Rs 23,000 den teimba alangba railway e-tickets 47 ngutet, ta parnoki ashi.

Iba dak sendakba nung Railways Act nung section 143 kübok ken o benok aser nisung 3 apu.

"Chapatoli, Dibrugarh (Assam) nung Mallika Colour House ta ser dokan ka nung özüng alema ticket ayoker ta February 18, 2022 nü osang angazük. Iba nung ajemdaker RPF indang CIB team/Tinsukia-i staff ka tenüng amer Railway e-ticket ka alitsü atema mita ao"

ta RPF-i metetdaksü.

Dokan kiburi personal ID ka amshia özüng alema ticket ka agütsü. Iba sülen RPF teloktemi dokan mita ao aser Rs 8117.00 (approx) alang railway e-tickets 14 ngutet.

Iba dokan nungi Laptop aser mobile handset den SIM ana ngutet aser nisung ka apu.

Ano külen, Naojan, Golaghat (Assam) nung dokan ana nung özüng alema mapa inyakba osang angazükba sülen RPF ktdangsürtemi Ankur Online Digital Service Point aser Arunoday Kendra Digital Sewa Common Services Centre mita ao.

Iba mapang dokan ka nung Rs. 8100 alangba railway e-tickets 21 den mobile phone ka aser ano tanga dokan nung Rs 7760 alangba railway e-tickets 12 den mobile phone ka apu.

Dokan kiburtemi personal ID amshia ticket temji özüng alema agizük.

Samagra Shiksha Nagaland... (TAPAK 2 NUNGI...)

School Education kübok sentong, inyaksangshi aser asalentong ajak school tem indang UDISE data nung amendaka lir, anungji UDISE data shidak bendentsü kangasa tongtipang kumogo.

UDISE exercise dak alia, training nungya Samagra Shiksha ajanga Ministry of Education, Government of India indang components tongtipang ajunga amshiba nung rangloktsü.

State nung shisaliok rangben

tajungba kuma renlokdaaktsütsü asoshi sentong aser inyakyim balala inyakba nung lenirtem shilem angatetdaksütsü mechi iba training ya ayongzüker.

Joint Mission Directors aser Deputy Mission Directors temi anir State Mission Office nungi team trok tashi iba training sentong nung shisalen sayur ama yoktsü, ta Kelhikha Kenye, Deputy Mission Director, Samagra Shiksha, Nagaland ajanga sangdong ka nung ashi.



Meghalaya Chief Minister Conrad K Sangma-i Chandmari Football Field, Tura nung mezüngbuba artificial turf soccer playground sayatsüogo. Iba ya Rs 8.10 crores endoka yanglu aser lapokba sentong nung Adviser to the Chief Minister Thomas A Sangma, West Garo Hills DC Ram Singh aser sorkar ktdangsürtem aden.



TIR YIMYIM

YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 28, 2022

Asen tamangba yimsü aser kensü

A khidang nungi asenok ya Tsüngrem dak amangba kin lir. Ibayongjiang, alima yanglusang Lijaba, kotak nung aliba Lungkitsüంగా aser asür lima obendangsang Meyutsüంగా dak amanga tsüraburtemi külema aru. Item tsüngremtemji akok tashi mejashidaksü peladaksütsü atema anemponga külem, benjong monga tenla agütsü aser asür lima timtem tekangshi nung malitsü atema akümüli nung ochishia ali. Iba ama akhi limapur tamangba yimsü yimya nung tsüngrem külema amanga alidang, anüolen nungi Tsüngrem tenyar Dr.Clark-i Yisu temeim osang tajung bener aru. Atangji, Dr.Clark-i bener aruba yimsü jagia alima aser anüng yanglusang Tsüngrem indang ashi aser nisung taküm ka atema akümüli nung aliba ya tatemang masü saka sür külena tanüla aliba lima kotak aser molumi lir ta jembü. Aortem asoshi, atangji, Dr.Clark-i bener aruba yimsüji balaka masü saka asenoki amangba yimsü den mesüktepa liasü. Tepilaji, Yihovah Tsüngremji temeim Tsüngrem, anungji nisungtem rongnung kati ka meimteptsüba dak alaka sempateptsü aser lepteptsüngteptsüba memelar ta Dr.Clark-i sayu aser Aortem asoshi tangar kolak tangzüka mangko bener arubaji tsüngrem tashi nung ajangzüktetba konang nüngsang mapa ka liasü. Ajisüaka, kodang Dr.Clark-i item tsükchitep mapatem ajak anener nisungtem rongnung meimtepa tesünep nung alitsü asoshi alima aser anüng yanglusang, kotak Tsüngremi par chir Yisu Khrista alimai yok aser Pa taküm bendanga agütsü ta angatetdaksü, asenok tsüraburtemi alima aser anüng yanglusang ajak madak Tsüngrem ka dang aser iba Tsüngremji temeim Tsüngrem ta angatet. Iba tangatetba nung kotak nung aliba kibur Tsüngremji Longkitsüంగా ta asen oshi nung agizük. Iba jagi, asenok tsüraburtemi mezüng Yisu yimsü agizüka amangtsü tenezükdang, Dr.Clark aser Gudhula nungertemi Ao oshi nung mejemba kenji Aor kensü nung Tsüngrem dang Longkitsüంగా (Loongkeezingba) ta enoka mejem. Iba kasaji, parnoki asenok dang tamasa Kibubai sayuba sarasadem indang ashidanga, Longkitsüంగా Yisu Khrista (Loongkeezingba Yeesoo Kreesta)-i pa nütüng dang sarasademtsü sayuba ta shia angutsü. Ajisüaka, asenok lialia aser jembia jembia, asenoki anüng aser ali yanglusang, akümüli aser asür ajak madak kibur dang ajaba tenüngtem ajak endoker, Lijaba, Longkitsüంగా aser Meyutsüంగా ta masü saka Tsüngrem ta melena amshi aser Tsüngrem külemba kentem ajak temesüng nisungtemi atenba ken parnok kensü nung dang meyipa atentsü tenezük. Ashi, tsürabur mapang tsüngrem amshiba yabo ain tashi aketba moijing tapu balala dang ajaba tenüng liasü. Aji oda, kodang asenoki amanga aruba tsüngremtem tenüng, amongtsümong aser kensü ajak endok asenok agi asenok masü amato melenshia adok. Iba temelenshi nungji tajunga tuluka liasü, kechiyong iba temelenshi jagi lepteptsüngtept anen, nungdak makaba anempong mapatem endok, merükmejutsü tenezük, achi ajem nung azüok aser kaketshisatsü angu. Ajisüaka, ano külen asenoki junga mebilemdangi inyakba kaji, asenok sobaliba, jembishinü aser kentenmenü ajak nung Aor agi America nunger küma onüba jakla aita adok, anungji kaketshisatsü bushiba tsütsüa English school lapoka Aori Ao jembitsü memelaba dang masü menütsü aser Ao ken tsürabur kensü nung atenbajibo tai amai bilem. Mapang kabo tsüngkotepsü abener tenla kidangi aobajia mazümalem mapa ka ama bilema liasü. Oda oda, asenok Aortema masü aser America nungertema masü ta tetsüngda nung Lijaba, Longkitsüంగా aser Meyutsüంగా natoa amadok aser Tsüngrem chir Yisu Khrista daka junga mamangtet ta tamangba nung kechi Tsüngrem ka dak amanger-a mejangja ka asenok tanü amangteper. Tanü asenoki Tsüngrem dak pei amangnütü amangba jakla ya, kodang, akhi tsüraburtemi amangba den medemdangdir, parnokibo Lijaba mejashidaksütsü merang, Longkitsüంగా tsüngdang taküm aser kibong meshiteta ali aser asür lima nung tepeladak linüba agi Meyutsüంగా tsüba akümüli nung mapa ajak ochishi inyak. Itemji, bilemdang dang, ashiko tanüa asenoki Meyutsüంగా Tsüngremji shitakba lir ta angateta amang nungbo, asenoki yamai ochimashi mapatem terendak kecha malibo meinyakla ta bilemer. Atangji, tanü asenok asüpila sentep nung nisung aikati asür nula dang Meyutsüంగా kidangi molushishia pei tetsü tebuo tenüng shia oangnie ta ashir, ajisüaka Meyutsüంగా jagi iba tanülaji pelashishia anikettsü asü manikettsüar, pai mesüra lai akümüli nung inyaka mapatem dak akettsü. Meyutsüంగా kikümüli obendangdak lir. Tanüa akhi tsüraburtemi angateta amangba amaji, asenokia Yisu Khristaji Tsüngrem chir, Paji Lijaba, Longkitsüంగా aser Meyutsüంగా ta amanga, Pa dak zep ta azüiter indangindang amangtsü kanga nungdaka kümogo. Iba amaji asenok tamang akangshiba den asenok tekülem kentema akhi tsürabur kensü tapu balala nung Dr.Clark aser Gudhula nungertemi mejema atenba amaji asenokia mejema tenlasang, iba jagi asenok Ochi dangi meyipdaksüla aser asenok Aorji Aor ama ochishia meraketa litetla.

OLEMSABANG

KHRISTAN YIMSÜ ARUR 150 AJUNGBA KÜM

(Tsüngrem Mamadokli. Tsüngrem Jashitsüsa Meinyakli)

~ Rev. Dr. Mar Pongener,

Executive Secretary, Ao Baptist Arogo Mungdang.

Meimchir dak tashi mait aika lir saka item ajak rongnung tashi mait tulutibaji 'ajangshia aruba mapangtem amadokba' ya lir. Amadokba nung ya takoksa tulu lir. Asen makamait, timtem tokrong tia nung alidang yaritem asen jenjang tajungba kümer külenbo amadoker anungji tenüngsang agütsüba tanela makadaksür. Shirang yipden nung tasütsüsa alidang Tsüngremi aneptsü saka taneptsü ngur külenbo Tsüngrem dang pelar ta ashitsü amadoker. Nungdak balala atalokdakjang ta Tsüngrem dang sarasademba langzüa Pai asen nungdak peridaksü saka iba sülenbo Tsüngrem tenüng asangtsü amadoker. Tsüngrem chir ka dak Tsüngrem nem tenüngsang agütsüba tanela samadaksüba takoksa rongnunga takoksa tulutiba ta metetdi. Tensa mapang balala ajanga liyonga arudang Tsüngremi yariba aser anir aruba bilemtetsüji laishibai sayur aser idakji Tsüngrem pelaba tulu lir. Dawidi Tsüngrem nem tenüngsang agütsüba Ken Pa tesüngmangtsü mapa pai inyakba, sayatenya pai inyakba, pai kazüka yokba bilemtetang. (1 Putipuyang 16:12). Tenüngsang agütsüba mulungjang tener alirtem jagi temoatsü anasü angur kechiaser parnoki temoatsü agizükdang pelar aser agizüker külen temoatsü anguba mapangtem bilemteter. Itemji Tsüngremi agizüktetsüsa litetertemji lir.

Joko tensa tera tajungba akümer (kanga junga kümogo tabo meshiteter) asünung ashikho aikati küm ana dak tema alima rangben Covid-19 wara agi amokmerena tsübudaksüba mapangtem meilungi amadoka odar asütsü akok. Saka iba mapang bilemtetang asükjang meronga tsüba bilemer. Tetsüba agi kima yimtung nunga mesenzüteti pei kidang shibanger litepba, onüa bilemaka lokti tekülem sentepi motet, külem lisemertem den o mejembitepi alitsüsa kümdaksüba, kipoksemi aotsü tsübudaksüba, kidang tachi tajemtsü agi anüngkong südaksüba mapangtem ajangogo. Kenunger aser adianu tasütsüsa shirangba osang angashi, parnok ali tangula matemdang ajurutepnua bilem saka meinyaktet. Aseni meima aliba kenungbo/kenungtsü/chirnur aser adianu asüdang tejaka mereprangdangi rema toktsü. Tasürtem atema tatemang sentong (funeral service) magitetba asoshi tang tashi sasasete bilemer. Item mapangtem nung Tsüngremi asenok yariba aseni amadokdima? Item mapangtem asenoki amadokra asenoki Tsüngrem jashitsüsa inyaksü ana nung lir ta metetdi.

Tasütsü wara agi amokmerena aser timtem tokrong tia nung alidang Tsüngrem dak alaka asen tejenokdak mali ta tali jangjaa meteta arua Ne süki nung ni teti lidi, aser ne tashikang kübok ni jenokdi T. Ken 61:3, Tsüngrem dak jenoktsü bushitete. Tsüngrem temulung chia lidi ta tangatetba nung aonung shia kibong tekülem metitemi agi. Kibong shia nungi sarasadem ola adokba agi kima yimtung lemala lemaa kümdaksü. Kenungertem ajak senteper Tsüngrem nüngsang ken atenba temenungratsü ola agi sünga liasü. Mic ajanga sayutsüngiba pei kidang nungi mokorai nüktzü yima angatep. Akokba lenmangtem nung kati ka yaritepba, chiyongtsü lemsatepa achiba, kilem nung nokdaker kati ka atema sarasademtsüba mapangtem liasü. Aika tebang nungi "tang ya asünungbo ni kotaki aotsü" ta shiteter aika liasü. Tanü tensa tera tajungba akümba agi Tsüngremi yaria aruba mapangtem amadoker Tsüngrem nungi pilaa alitsü merangertem takoksa tulu asütsü.

Tsüngremer tesüngmangtsü mapatem mamadokli kechiaser Pai asen asoshi teti tajung inyaker. Ya angatetdi. Naga lima rangben yi ajanga raksadaksüba Naga nungertemi angateta aru. Yi ajanga kija taküm, kibong aser lokti raksadaksüba meteta aru. Temeimbatem aika anojungi yi agi jemseta südaksüba mangyim aser tesasa ulura liasü. Yi ajanga takoksa, timtem aser khuret bener arutsübatem indang shisadangdang nisungtem mulungjang raksadaksü. Iba amai dang lia aotsü ya khuret tulu ta angateta Tsüngrem dangi sarasadem ola yoktsü tenezük. Iba takoksa jenjang nungi onok anitetang ta Tsüngrem chirtemi sarasadem. Naga lima nungi yi samajang ta Tsüngrem dang ayimtentü tenezük. ABAM aser arogotemi sentong balala ayonga akadang nüktzü jendi endok. Amang sangwa metetemi Yi tongpang den rara. Nagaland 'Dry State' maküm tashi tasü tashi lümitsü ta mulungteter tiemba tiemba aküm. Tesem ajaklen sarasadem tashi nung azüiter yi anema rara. Rongsen aser nübu jendi mesasai endok. Tsüngremi agütsüba shisatsü dak alaka alima meimchirtemi agütsüba shisatsü tongtipang masü ta angatet. Tasü maittsü olulu aser amokmerenba osangtem agi tamangertem tamang manokshidaksü. Tsüngrem tsüba dak alaka nisung tsüba tanela maliasü. Tsüngrem kisung dak rangloker yi anema raratsü apuso. Tsüngrem chirtemi ayimtenba ola agi ketdangsurtema mesüngjemi kümdaksü. Tesüsa Government-i Nagaland Liquor Total Prohibition Act, 1989 nung agizüka sangdong. Tsüngremi takokba agütsü. Yabo nisunger tashi kisung agi raraba ka masü saka Tsüngrem tashi tener raraba tongpang liasü. Yi atakatemer rongtokba nungji Tsüngrem tena liasü. Ya Tsüngremer tatenba lia koktetba tongpang ka liasü ta tanü alirtem shiri amadoker, takoksaji ngulanglang aser temoatsü malitsü ta metetdi.

Asen limai Khristan yimsü arur küm 150 ajungba küm. NLTP Act agizüker küm 33 ajungba küm. Mabensai inyaka arubatem abensaa inyaksü merangtsüba mapang. Tsüngrem pelatsüsa meinyakteti lia arubatem lepa repranger nangri kangshir tamang nung akangshir nokdaksü mapang. Nisunger tashitemetet aser shisatsü masü saka Tsüngremi agütsüba shisatsü dak metaloker temelenshi bener arutsü merangtsüba mapang. Saka alima asünung temelenshiba balala bener arutsü merangdang Tsüngrem sentong tongtipang mekümdaksü. Tsüngrem tashi tener amangbapurtemi sarasadem nüktzü lalua kokteta toktsüba tongpang ka nung tanü temelenshiba bener arutsü merangteper. Alima tashitemetet aser tangatetba agi Tsüngremer temeshiba yimli laodaksütsüsa inyaktetra takoksa tulu asütsü ta angatetsüla. Tashitemetet shibai bushitet, aser shibai tangatetba angur, pa tepelatsü. (A. Shin 3:13). Tashitemtetji tajung saka idakji tangatetba makara shia metetbaji amajok anungji tangatetba nung akanga alitsüji kanga tongtipang. Tashitemetet dak metaloker tangatetba makai Tsüngrem yimli sendoka toktsüra temoatsü malitsü. Shisadangdi! Angatetdi! aser arung aseni jembiba aser inyakba agi Tsüngrem mejashidaksüli.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir



February 27, 2022 nü Sneinton yimti nung aliba St. Alban Tenla kidang Ukraine nung yimjung atema sarasademba sentong agidang tangokba noksa nung angur.

Samaritan's Purse aser WH-i Ukraine nunger nem teyari agütsür

February 27, 2022: International Christian relief groups- Samaritans' Purse aser World Help nati Ukrainian Arogo den longjemer Ukraine nung rara ajanga kongshirtem nem teyari agütsür.

Russia nunger sepaitemi Ukraine amak tenzüker Amongnü tashi nung anogo pezü abensaogo; Hokolbar nungi tenzüka Russsia nunger sepaitemi Ukraine yimtiba, Kyiv amakba sülen yimti nung alirtem dang tejenokdak bushitsü aser kichibaleni maotsü metetdakja liasü.

Honibarnep Russia nunger missile kati Kyiv nung aliba international airport anasa building ka poksatsü; iba rara ajanga nisung aika süogo aser noklang aika yiruogo.

Tang ama tensa ka nung Evangelical Khristan telok-Samaritan's Purse-i Disaster response specialist tem Poland aser Romania nati yokogo, kechiyong linük ana nungji Ukraine nunger refugees aika jenokdar.

Hokolbar aonung tashi nung Ukraine nunger 50,000 shii linük toktsür jenogo aser ano meyrjang aika arrtsüleni jendar, ta Honibarnü United Nations High Commissioner for Refugees, Filippo Grandi-i metetdaksü.

Grandi-i ashiba agi, Brihostibar tashi nung Ukraine nunger 100,000 shii Ukraine toktsür jenogo.

Mongintemi ashiba agi, iba rara ya mapang talangka manenra Ukriane nunger million aika ajentsü aser parnoki teyari nungdaksü.

Sayutsünger, Franklin Graham-i, "Onoki temeket nung aliba linüktem dangi Disaster Assistance Response Team yokogo aser iba rara ajanga takoksa angurtem yaritsü parnok renema dang lir. Ukraine atema sarasademtsüba den külemi iba rara tekaraba nung anentsü atema kü den külemi sarasadem nung shilem agidaksüner," ta metetdaksü.

Samaritan's Purse nungi specialists team nung medical staff temi Ukraine kidanger linüktem nung Ukraine nunger yaridar. Franklin Graham-i aniba telokisa Ukraine nung Arogotem den senteper teyari balala agütsütsü atema jembidar.

Samaritan's Purse-i Ukraine tesem balala nung Arogo 3,000 den longjemer inyaker aser parnokisa Emergency Field Hospital ka renemdar.

Samaritan's Purse-isa Operation Christmas Child kübok tanurtem nem tsüngsem box 600,000 agütsütsü.

Ano külen Christian group-World Help-ia Ukraine nung Arogotem aser Khristan melungtet teloktem den senteper jenshia aliba Ukraine nunger 1,000 shi nem teyari agütsüdar.

International Partnerships for World Help Director, Kraig Cole-i, "Ukraine nunger atema onok melung raksar. Yisu Khrista teka aser tetsüngi inyakba ama inyaksü atema onok jatet, anungji onoki tekaraba nung teyari agütsüner. Russia nungeri amaksü aliba atema onok renema liasü, ajisüaka yamai sashia amaksü, ta onoki bilema maliasü.

Ukraine nung tensa ano koba tashika majungtsüar asenoki meteta mali, kechiyong tang ang tetenzüker," ta metetdaksü.

Cole-isa America nunger Khristantem dang Ukraine nunger nem teyari agüjang, ta ayongzüik.

"Yaritsüsa nisung ajak dak tashi lir. Sempet tilaka dang agütsüyonga ibaji nungdak. Tajung Samaria -i inyakba ama inyaksü aser yirua alir kar yaritsü atema asenok nem maongka agütsür," ta metetdaksü.

Hokolbar aonung US Tir, Joe Biden-ia Ukraine nunger nem dollar sen million 600- military teyari atema million 350 aser teyari balala atema million 250 agütsütsü, ta sangdongogo.

Hokolbar aonung Ukraine Tir, Volodymyr Zelenskyy-i video call ajanga Europe nung lenirtem dang, pai parnok den jembiba ya tang tatembangbuba asütsüa akok, ta metetdakja liasü.

United States-ibo Ukraine Tir, Zelenskyy dang pa kümzüksü asüandanganga liasü saka pai linük toktsür moui raratsü, ta langzüa liasü.

Tang Russia-i Ukraine amakba ya Europe nung World War II sülenbo tang rara tuluba lir. Russia-i Ukraine amakba atema alima linüktem aikati Russia aitsüogo.

Ukraine amakba anema Russia nunga longkak atema ketdangsertemi nisung 1,800 shi puogo; Russia nunger kentenertem, television show host tem aser osangbenertemia Russia lenirtem anema ola adokdar.

Iraqi Committee-i Khristan 120 nem kiojen meyipa agütsüogo

February 27, 2022: Iraqi Shiite lenir, Muqtada al-Sadr aser Committee for Restitution of Property-i meranga inyakba ajanga Khristan 120 nem kiojentem meyipa agütsüogo, ta International Christian Concern (ICC)-i metetdaksü.

Item kiojenji tamalen Khristantem ket nungi tashiyim

amshia rakzüka liasü. Yaküm January ita nung committee-i item kiojen bushiba den külemi bushisüngdanga aruba sülen ita ishika dang lirbo Khristantem nem item kiojen meyipa agütsü tenzüka liasü.

2003 küm Iraq nung kiralongrartem aser auertemi amakba mapang nung

Khristantemi pei ki, dokan aser kiojen balala toktsür ajen, iba sülen kiralongrartemi item kiojen agia liasü.

Iba sülen küm ishika lir Khristan MP, Yonadam Kanna-i auertemi item kiojen agitsü atema tiyazü nung kuli kaketterem yangluba jungkai adokja liasü.

ANO GO ABEN TSÜNGREM DEN

Shisatsü tajungba

"Shisatsüji tongpang nung nok-o-nü dang nungi tajungba, saka temenenpur kati tajung aika samatsür." Sayutsünger 9:18

Alima ajak nung nüburtemi pei linük (Nation) lima aser nübur kümzüka aser wazüka ayutsü atema budget nung sen aika inoka nok-o-nü tajung aser tesashi jenti yanglur aser pi dang nungia alizüka yuteper. Tanü alima nung nok-o-nü yangluba nung sen timtiba indokba linükji USA, parnoki par sen dollar 718 billion tashi 2020 küm amshitsü renema aliba angur. Saka Tsüngrem O-ji kodang shisadangdir, nok-o-nü dang nungi shisatsü temaba aser tajungba; kechiaser kodang ana indangji asadangdir nok-o-nü jagi kodanga yimjung bener marutsür saka tesamatsüba mesüra teraksa tuluba agütsür; saka tongpang rara alidak, kodang yimjung O bentepa jembidir, iba jagi raraba anendaktsür aser alima aser nüburtem tesünep jenjang dangi anir arur. Temeim amangbapurtem, Tsüngrem nungi anguba teindang shisatsü aser asen lima aser Arogo nung aliba nungdakba nüburtem yaritettsüsa asenok moaja amlepong ta sarasademi.

SARASADEM

Temeim Tsüngrem nai agütsüba shisatsü timi ketdangsüa amshiba ajanga tangar yaritettsü Nai ni maneni yariang ta sarasadema mepishir. Amen

'In Jesus Name' ken kanga nungtugu kümogo



February 27, 2022: life in Jesus name." Osangtajung kentener, Katy Nichole indang ken "In Jesus Name (God of Possible)," TikTok video nung kanga prokshiba sülen 80 million views jungogo.

Tawa iba ken TikTok aser Instagram nung kanga nungtugu akümba sülen Nichole-i Christian label Centricity Music nung adentsü atema maongka ngua sign asüba den külemi lai tanga maongka aika angu.

Nicole-i Centricity Music nung sign asüba sülen Christian radio giant K-LOVE-ia iba kenji temtsü.

Iba ken ya coronavirus wara mapang nung lai zülua liasü; iba mapang nungji la-a temang nung timtem liasü.

Nichole-i atenba ken 'In Jesus Name' leplazü nung kenjangji yamai lir, "I pray for your healing /That circumstances would change /I pray that the fear inside would flee /In Jesus name /I pray that a breakthrough would happen today /I pray miracles over your

Iba ken ajanga tamangertem dang pei tamang manokshii Tsüngrem dak tamang akatsü aser sarasadem nung tashi tulu aliba indang jangjatsü ayongzüker.

Iba ken mezüludang la dak tongtoret nung timtem ka (scoliosis) adoka liasü. La tongtoret surgery agiba sülen küm asem lir tanaben surgery agi.

"Ni tanaben surgery agiba sülenbo kü dak tejashi ajak samadok. Iba mapang nungji ni Kibuba ajuru. Surgery agiba sülen X-rays ajanga kü tongtoret teindangba akümba ni metet. Tsüngremi sayatenya inyaker, kechiyong ni iba kuliji nguogo," ta lai ashi.

Tekülem aser tetushi kentener, Nichole tawa Nashville-i ao aser tangbo la Shriners Hospitals for Children nung ambassador aser Musicians On Call nung volunteer inyaker.

Nichole-i tang mezüng kensep ka adoktsü atema maziüngi inyakdar.

OLONG PAITEP # 6096

1		2		3		4	5			
				6						7
		8								
9				10		11				
			12					13		
						14				
16						17				

- | | | | |
|----------------------------|-------|--------------------------------|-------|
| TIPIEN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S _ _ _ i | - (3) | 5. Yim lenmang | - (5) |
| 9. Nisung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Majinü | - (5) |
| 13. Tsük rizüngdak | - (3) | 13. Tzuma nung senzüba | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

OLONG PAITEP # 6095 TELANGZÜBA

- | | |
|---|--|
| TIPIEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Tallia, 11. Aren, 12. Tzübo, 14. Alla, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |



SCHOOL KA NUNG :



Tesayur : Atsüki nungi atokba chungtsü asem (3) züluang ?

Sobangba : Yungjak, polong, sümomo

Alokba : Ozü atsüki nung AK asem lir AK ki tapok nungi parnok ka Ken ka Ken ta adoker.

Tesayur : Oh alokba!!!

Lilir : WhatsApp

TANÜBO NAI LANGZÜANG

Q. 'Sustainable Cities India program' nung longjemtsü atema National Institute of Urban Affairs (NIUA)-i koba institution den MoU sign asü?

- [A] NITI Aayog [B] World Economic Forum
[C] World Bank [D] UNDP

(Taruba adok nung onoki langzüsü)

YASHIADOK TELANGZÜBA : Artificial Vision

AO OSHI ANGAZÜKDAK:

TANÜ ANGAZÜKTSÜBA OJANG



Meren

(v) aküm taket, meraketa yimsü asüba (high respect)

* Mejensangertemi kanga **merena** yimsü asü.

Meren

(v) o agi tsübudaktsü (threaten)

* Taintemi tanurtem kanga mejungi **meren**.

NAI-A YA METETTER MA



1984 küm February 28 nü 26buba Grammy Awards sentong nung musician aser entertainer Michael Jackson-i Award 8 angu. Iba sentong nung Michael-i Best R&B Vocal, Male for 'Billie Jean', Best R&B Song (Songwriter) for 'Billie Jean', Best Rock Vocal, Male for 'Beat It', Producer of the Year (Non-Classical), Best Pop Vocal, Male for 'Thriller', Best Video Album for 'Thriller', Best Recording for Children (Quincy Jones (Producer) & Michael Jackson for 'E.T. the Extra-Terrestrial', Record of the Year 'Beat It', Album of the Year for 'Thriller' nung award 8 agizük.

SUDOKU # 6135

	3		7		1	2	5	6			
		6			5			8			
		1		3	6	7		4			
	7	5	4					3			
				1		6					
			2	7	9	1					
9	2			5				7			
		7			2			6			
	8	4									

TELANGZÜBA # 6134

1	6	2	3	5	4	9	8	7
8	4	3	2	9	7	5	1	6
5	7	9	1	8	6	3	4	2
6	3	5	9	4	8	7	2	1
7	9	1	6	2	3	8	5	4
4	2	8	5	7	1	6	9	3
9	1	7	4	3	5	2	6	8
3	5	4	8	6	2	1	7	9
2	8	6	7	1	9	4	3	5

OJANG LUTEP # 5681

- NGKAA :
- GDAN :
- JEMRAA :
- IRJEMB :
- KSAA :
- APMA :
- IAG :
- SUTSAYÜ :
- YONATSÜAGA :
- LIAR :

OJANG LUTEP TELANGZÜBA # 5680

TERAKA METETTBA NUNG TEMULUNG LEMER
PEI BILEMBA NUNG INYAKTSÜ MERANGER

TAN HOPTA ATEMA - KOMA SÜLA ?

Q. Kohima aser Dimapur nung alir Aotsür Aor vote ajak Mokokchung district kübok pei pei yimtsüngi belena bener ao nunga koma süla ?



February 27, 2022 nü Ukraine nung azünger kaketshirtem Ahmedabad timti tonga aruba sülen parnoki takok anguba temaitsü sayuba noksa nung angur. Air India tayimtsü ajanga India nunger aika Ukraine nungi anir arudar.

Yogi sorkari UP nung sentsüh 40% bendenloktsüogo: P Chidambaram

Lucknow, February 27 (Agencies): Amongnü Congress lenir, P Chidambaram-i, Yogi Adityanath sorkar ajanga state ano tesensakba kümdaktsüogo aser state sentsüh shilem 40 bendenloktsüogo, ta metetdaksü.

BJP sorkar aliba Uttar Pradesh state nung Congress party pusema Chidambaram-i, Congress yimyim 'Tetsür süaka ajak akoktsü' yimyim ajanga elections nung tetsür-tebur kasa züngshiba nükjidong ataloktsüogo, ta ashi.

"Nenoki kechi atema vote agütsür? Adityanath sorkar ya tashi tali amshiba, tamangba yimsü nung ajemdaker tesempatep adokdaksüba, kin tsüngda tsükchitepdaktsüba, police-i tashiyim amshiba aser tetsür-tebur nung ajemdaker inyakba sorkar lir," ta Congress leniri ashi.

"Yogi model ajanga state

ano tesensakba kümdaktsüogo aser Uttar Pradesh nunger timbaka sensaker kümdaktsüogo," ta pai ashi.

Uttar Pradesh nungertem ya mapa kanga meranga inyakertem lir, ta tenüngsanga pai, "Nenok votes ajanga Ato kilonser 8 tashi Delhi-i yokogo aser parnok ajak akhümket aliba lenirtem liasü. Iba tarensen nungji Narendra Modi dendaktsüra pa 9buba asütsü. Ajisüaka Uttar Pradesh ya sensaker, nüburttem ya sensakertem aser rongsenkettsüng den social indicators aika nung iba state ya jenjang teküboktiba nung lir," ta metetdaksü.

"Mapang talangka lir sülen Congress-i constituency 403 prongla nung candidates toktepdaktsür. Elections nung tetsür-tebur mebendangi züngshiba nükjidong party-i tenzüko. Party yimyimji, 'Ni tetsür ka aser ni akoktsü' yimyim ajanga nüboyimba nung tashi tasen ka

agütsüogo," ta paisa shisem.

"Ni Uttar Pradesh nüburttem dang Congress pusemstü aser Congress' candidates nem vote agütsütsü mepishir," ta pai ashi.

Yogi Adityanath-i aniba sorkar aija taoba mapang Union Minister Chidambaram-i, 2016-17 kum Uttar Pradesh indang Gross State Domestic Product (GSDP) shilem 11.4 aliba nungi 2020-21 kum tashi nungbo shilem -6.4 dang kümogo, ta metetdaksü.

"Adityanath yimsüsüba kübok kum shia per capita income shilem 1.9 agi tajemba kümogo. Tang state sentsüh ajak senteper sen crore 6,62,891 lir, aser ibaji GSDP shilem 34.2 lir, aser Adityanath kijai sentsüh shilem 40 bendenloktsü," ta metetdaksü.

NITI Aayog-i sayaba multi-dimensional poverty index metetdakja pai, Uttar Pradesh nung nütsüng shilem 37.9 bo sensakertem lir, ta ashi.

India-i alima nung yimjung aginer: Rajnath Singh

Ballia, February 27 (Agencies): Russia-i Ukraine amakba mapang nung Amongnü Union defence minister, Rajnath Singh-i, India-i alima nung yimjung aginer, ta ashi.

"Iba onük nung Ato kilonser Narendra Modi-i agiba shilem pelaa agizüker. India ya yimjung meimba linük ka lir. India-i kodanga tangar linük mamak mesüra tangar linük meyong litsü rakzüka magi," ta paisa metetdaksü.

Uttar Pradesh kübok Bairia nung election nüboyim sentong

ka nung jembidang Rajnath-i, "Onoki alima nung yimjung aginer, aser ibaji ajaki agizüktetsüla," ta ashi.

"India-i Pakistan anema surgical air strike aoba sülen alima matsüngdang India noksa melenshiogo. Linük tashi taitba kümogo. India den asayatsü makok ta alima nem osang ka agütsüogo," ta paisa metetdaksü.

Kobi melii India ya defence sector nung tangar dak memetaloki aliba linük ka akümtsü; tangar dang nungi defence osettem alizükba linük ka

masü saka tangar dang ayokba linük ka akümtsü, ta pai ashi.

Yimtenren tsütsü mongintemi UP nungano maneni BJP sorkar arutsü ta asadangteto; state nung gol asem aketba sorkar amenoktsü; Modi mangdang, Yogi mapa aser nüburttemi nungitba ajanga gol asemi mapa inyaktsü, ta pai ashi.

Uttar Pradesh nung assembly election shilem 6buba March 3 nü agitsü aser iba shilem nung Ballia constituency densema lir.

India nunger anir arutsü atema meranga inyakdar: PM Modi

Basti, Tsüklai/February 27 (Agencies): Ukraine nung aliba India nunger ajak anir arutsü atema sorkari meranga inyakdar, ta Amongnü Ato kilonser, Narendra Modi-i metetdaksü.

Uttar Pradesh kübok Basti nung election sentong ka nung jembidang Modi-i, tang alima tensa mapang kanga mejungi kümogo, anungji asen linük ya tangar dak memetaloki aliba linük ka kümdaktsütsü atema asenoki inyaktsüla, ta ayongzük.

Russia-i Ukraine amakba mapang nung Honibar nungi India-i sensotem iba linük nungjagi anir aruba maparen tenzüko. Ukrainian airspace shibangba ajanga iba linük nungjagi tayimtsü mesenzür, ibayongji India nunger tayimtsüttem Romania yimtiba, Bucharest aser Hungary

yimtiba, Budapest na nungi senzür.

Ato kilonser, Modi-i, tamalen India nung kibongi yimsüsüba sorkartemi defence nungdaktem atema tanga linüktem dak ang metaloka liasü, ajisüaka tangbo tangar dak memetaloki alitsü atema asenoki rangloker inyaker, ta ashi.

Opposition aija pai, India-i Pakistan kübok Balakot nung kiralongrartem amakba sülen kum asem ajungbamong February 26 nü mongogo saka kibongi dang yimsü süa arurtemi tamalen Balakot amakba kuli meshia liasü, ta ashi.

Amongnü Modi-isa Sant Kabir Nagar, Siddarthnagar aser Ambedkarnagar nung BJP candidate tem atema nübo yimtsüba sentong nung jemiogo. Item area nung March 3 nü assembly elections shilem trokbuba agitsü.



February 27, 2022 nü New Delhi nung National Akali Dal züngsemtemi alima nung yimjung atema shilem agiba den külemi Ato kilonser, Narendra Modi dang Ukraine nung rara anentsü atema Russia Tir, Vladimir Putin den jembiang, ta takhangba agütsüba noksa nung angur.

India nunger ket nung visa meliaka Poland nung jenoktsü melar

New Delhi, February 27 (Agencies): Poland linüki Ukraine linük nung aliba India nungertem ket nung visa meliaka ozü linük nung jenoktsü atema melar, ta Amongnü India nung aliba Poland Embassy-i metetdaksü.

Ambassador of Poland to India, Adam Burakowski-i iba osangji pa indang Twitter handle ajanga metetdaksü.

Burakowski-i twitter ajanga, "Russia nungeri amakba ajanga Ukraine nungi India nunger kaketshirtem ket nung visa meliaka Poland-i arutsü melar," ta metetdaksü.

Amongnü India External Affairs Minister, Dr S Jaishankar-i, 'Operation Ganga' kübok India nunger tayimtsü pezübuba Bucharest (Romania) nungi apusoogo; iba tayimtsü nungji Ukraine nung alir India nunger 198 anir Delhi-i arudar, ta metetdakja liasü.

"Operation Ganga maneni senzüdar. Bucharest nungi Delhi tashi India nunger 198 anir arutsü atema tayimtsü

pezübuba apusoogo," ta Jaishankar-i twitter ajanga metetdaksü.

Operation Ganga kübok Hungary yimtiba, Budapest nungia India nunger 240 Delhi-i anir aruogo, ta Jaishankar-isa metetdakja liasü.

Tang Ukraine-Russia tensa nung ajemdaker Ukraine yimtiba, Kyiv nung aliba Indian Embassy-i India nungertem dang sorkar ketdangsertem den metetpelaba sülen ang border checkpoints-i aotsü tekümdangtsü metetdakja liasü.

Tang rara adoka aliba Ukraine linük nungi tang tashi nung India nunger 469 Delhi tonga anir aruogo. Amongnü anepdang India nunger 250 Delhi tonga aru aser Honibar nikongdanga India nunger 219 Mumbai tonga arua liasü.

Indian embassy-isa India nungertem dang tzü, chiyungtsü, tejenokdak aser nungdak balala angutsü atema Ukraine anüolen aliba yimtittem nung jenoktsü metetdakja liasü.



Ferbruary 27, 2022 nü Prayagraj nung aliba polling station ka nung voter tem tarensena nokdaka aliba noksa nung angur. Amongnü Uttar Pradesh nung Assembly elections shilem pongububa agiogo.

MENUNGRA BILEMTETER



Lt. Moajungla Jamir
24.08.1965 - 28.02.2021

Oja nai onok toktsür or küm ka suiteama arur. Anogo shia na onok melongjang nung teti lir, Nü temiem aser Sayatsüngi O tem, Nü sarasadem aser mapa tajungtem menungra bilemteter.

Temeim Kinungbu, chirnur, semchisemnur aser Kinungterem.

Shruti Haasan dak COVID-19 putet



nung anidak yongjia, kü dak Covid-19 positive putet. Iba tashidak nungi taneptsü nudar aser tanaben wadang nung inyaksü asoshi matatetter! Nenok ajak dang kanga pelar aser yakta ajuruteptsü yongyar," ta lai lemsatep.

Amazon Prime Video indang psychological thriller series, Bestseller nung Shruti-i tesüsa shilem agiba nguogo.

Shruti indang web series 'Bestseller' ya February 18, 2022 nü saya liasü.

La indang taruba project rongnung 'Salaar' dena lir aser lai Prabhas den külemi shilem agiba angutsü. Prashant Neel-i direct asütsü aliba film ya Shruti indang mezüing Kannada film asütsü.

Director Gopichandh Malineni indang film nunga Shruti-i Nandamuri Balakrishna den külemi shilem agiba angutsü.

Chennai, Tsüklai/February 27, 2022 (Agencies): Deobarnü Actress Shruti Hassan-i ashiba agi, novel coronavirus positive putetba sülen "kü temang tajungba kümard".

Arishi küm 36 tain Shruti-i Instagram nung fans den iba osang lemsatepa liasü.

"Tekümdangtsü mera ajak

Mumbai aser Ladakh nung 'Ganapath' tangoktsü

New Delhi, Tsüklai/February 27, 2022 (Agencies): Taoba küm tatemlen ka nungi UK nung Tiger Shroff aser Kriti Sanon nati 'Ganapath' atema tangok tenzükogo aser sangdong ajanga angazükba agi, iba drama nung Tiger Shroff tebu ama shilem agidaktsütsü asoshi film yanglurtemi actor Rahman aniokogo.

Iba film set nung Kriti pelashishia agizüka, Tiger-i, Instagram nung, "Action atema mapang tongogo. Kriti-i #Ganapath indang UK schedule tenzüktsü renemdar aser iba film nung kü den tongti shilem agir - Jassi pelashishia agizüker. @kritisanon den longjemtsü asoshi yongyaseter," ta lemsatep.

Sangdong ajanga angazükba agi, Ganapath indang London schedule tangokmaba sülen, taruba ita Tiger aser Kriti nati Mumbai yimti nung tanabuba schedule tangok tenzüktsü. Iba sülen Ladakh nung ano schedule tanga ka tangoktsü.

"Tawa film yanglurtemi iba film atema Ladakh schedule dak sendakba nung maparen renemogo aser iba tesem nung

yakta film tangok tenzüktsü renemdar. Tongtibang sequence kar tangoktsü atema parnoki tesemtem asadanga liasü aser Ladakh nung iba schedule tangoktsü lemtet. Mumbai aser Ladakh schedule anaprongla ita ka nung tangoktsü sentong lir, iba sülen film maparen tembangtsü," ta otongdar kati ashi.

'Ganapath' metangokdang, London nung Tiger-i Ahmed Khan aser Sajid Nadiadwala na indang Heropanti 2 tangoka liasü.

2014 küm sayaba romantic-action film -Heropanti nung Tiger aser Kriti nati mezüing longjemba sülen, küm 8 lir Jackky Bhagnani production nung tena tanaben longjemer.

Tang teinyakdak aliba project dak alaka, Tiger aser Kriti naprongla project balala nung inyaksü sentong lir.

Ganapath aser Heropanti 2 dak alia, Bade Miyan Chote Miyan nung Akshay Kumar aser Tiger Shroff na longjemtsü, ta sangdong ajanga metetdaksü. Ano külen, Kriti-ia Bachchan Paandey, Adipurush aser Bhediya nung shilem agiba angutsü.

Tabu-i 'Bhool Bhulaiyaa 2' tangokmaogo

Mumbai, Tsüklai/February 27, 2022 (Agencies): Kartik Aaryan aser Kiara Advani nati tongti shilem agiba "Bhool Bhulaiyaa 2" ya film sapurtemi kanga dang yongya ataba film rongnung ka asütsü. Anees Bazmee-i iba film direct süogo.

Iba film nung shilem tongti shilem agir indang noksa balala sayaogo. Iba film poster nung Kartik Aaryan-i sübosülemtsü balaka semer pa kolak nung bandana mesür aliba nguogo.

Actress Tabu-ia iba film nung shilem agir. Iba horror drama "Bhool Bhulaiyaa 2" ya March 25, 2022 nü sayatsü.

Hokolbarnü, Tabu-i iba film tangokmaba osang den noksa

lemsatepa liasü.

Instagram nung Tabu-i, "Maparen tepor junga renemogo. Tanü, Bhool Bhulaiyaa 2 tangokmaogo," ta lemsatep.

Tabu-i lemsatepba noksa nung lai film indang crew members den külemi tangoka lir.

Bhool Bhulaiyaa 2 ya 'Bhool Bhulaiyaa' film den tatongtep asütsü. Mezüing film (original version) nung Akshay Kumar aser Vidya Balan nati tongti shilem agiogo.

Kartik-ia iba film indang poster ka den "25th MARCH 2022 nü theatre nung BhoolBhulaiyaa2 sayatsü," ta

lemsatep.

Iba film nung TV actor Amar Upadhyay-ia tongti shilem agiba angutsü.

Bhool Bhulaiyaa 2 ya taoba küm (2021) November 19 nü sayatsü renemer liasü, saka India nung Covid-19 wara junga süshia maoba ajanga iba film sayatsü anogo atsülangtsü. Bhool Bhulaiyaa 2 dak alaka, Kartik-i 'Freddy' nung Alaya F den külemi shilem agiba angutsü.

Maneni, Tabu-ia Vishal Bhardwaj indang Khufiya nung shilem agiba angutsü. Iba thriller nung Ali Fazal, Wamiqa Gabbi aser Ashish Vidyarthi nungeri tongti shilem agiogo.

Phek nung Intensive Cooking Course ayongzük



Phek jila kübok tetsürtem atema ayongba 'Free Intensive Cooking Course' nung shilem agirtem aser tongtibang nisungtem külemi tangokba noksa nung angur.

Kohima, Tsüklai/February 27, 2022 (TYO): Phek jila nung February 22 nungi 24, 2022 tashi tetsürtem 'Free Intensive Cooking Course' ayonga agiogo, ta sangdong ka ajanga metetdaksü.

'Beti Bachao Beti Padhao' (BBBP) kübok GA Guest House Phek nung District Administration aser District Level Centre for Women-Mahila Shakti Kendra (BBBP), Phek longjemer iba sentong ayongzüka liasü.

Iba training session nung, Deputy Commissioner, Phek, Razouvolie Dozo-i ashiba agi, sorchiokba yimya/tasa ajanga yimtak -yimtsüing nung alir tetsürtem ajungkettsütsü aser tangar teyari magii pei sasa

inyaka lidaktsütsü nükjidong nung iba training ayongzükter.

Dozo-i, meranga, nendaka aser bendanga agütsür inyaksü aser iba training mapang angazükba sorchiokba yimya/tasa tem tajungtiba nung amshitsü asoshi training agirtem ajungshia liasü.

Iba Cooking Skill training nung Naga Chef season 4 indang finalist, Chef Kusa Lohe shisalen sayur ama denogo.

District nung tetsürtem ajungkettsü nükjidong nung iba training ayongzükba atema Lohe-i Department dang pelaba metetdaksü.

Anogo asem tashi ayongba Intensive Cooking Course training nung Phek District kübok tesem balala nungi tetsür

35 agi shilem agiogo.

Iba training mapang Indian aser Chinese cuisine balala 15 tashi yanglutsü sayua liasü. Training nung shilem agir ana-Kekhroche T. Tara aser Dzulalu Duku nati iba training nung angazükba/ajangshibatem lemsatep.

Iba training nung shilem agir ajak nem kitchen sets aser Apron sets indang gift hamper agütsü.

Maneni, iba sentong nung BBBP, Phek indang Nodal Officer, Wetshe Lasushe EAC menden liasü. Iba training tembanga, Women Welfare Officer, DLCW-Mahila Shakti Kendra, Phek, Vilenuo Kapu-i tepela anküp o jemi, ta kasa sangdong ajanga ashi.

June 10 nung Prithviraj sayatsü

New Delhi, Tsüklai/February 27, 2022 (Agencies): Bollywood star Akshay Kumar, Sonu Sood, Sanjay Dutt aser Manushi Chhillar nunger indang film - Prithviraj ya theatre nung sayatsü terenemba lir.

YRF indang film, koba 2020 küm sayatsü renemer liasü, alima ajanga asungba Covid-19 wara ajanga iba film sayatsü anogo atsülangtsü. Chandraprakash Dwivedi-i direct asüba Prithviraj ya June 10, 2022 nü theatre nung sayatsü.

Akshay Kumar-ia iba film indang poster kar lemsatepa liasü. "#Prithviraj Chauhan indang otsü June 10 nü Hindi, Tamil aser Telugu oshi nung

sayatsü," ta Akshay-i lemsatep.

2021 küm tatemlen November ita iba film indang mezüing teaser saya liasü. Iba film nung Ashutosh Rana, Sakshi Tanwar, Manav Vij aser Lalit Tiwari nungeri tongti shilem agir aser 2017 Miss World, Manushi-i film nung mezüing shilem agiba angutsü.

"India putiotsü nung tetsübu maliba aser tasütait Chuba - Prithviraj Chauhan indang shilem agütsü maongka anguba ya atangji nunga khonang ama lir. Asenoki linük indang chubatem teti bilemtettsüla aser parnoki India asoshi tajung inyakbatem pela agizüktsüla. Taochi mesayuba tsükchir ka matsüingdang tasüita noktaker

rongnung Prithviraj liasü aser ibaji ajanga pa ya India nunger chichiba sarir ka ama züingshir," ta pai ashi.

Rajput Chuba, Prithviraj taküm otsü nung ajemdaker yangluba film ajanga nübur tsüingda mangatetep adok. Lucknow nung iba film nokdangtsü asoshi petition tasüsa agütsü. Iba film mesayudang, jelia screening agütsü asoshi Karni Sena-ia mepishiogo.

Prithviraj mesayudang, Akshay-i Bachchan Pandey nung tongti shilem agiba angutsü. Iba dak alaka, Akshay indang film tasen rongnung Ram Setu, Raksha Bandhan, Gorkha aser OMG 2 dena lir.

Mexican Open: Nadal-i Norrie koka title 91buba benogo 7buba Forlic Cup ayonger



Tsüklai/February 27, 2022 (Agencies): Rafael Nadal-iba hopta tetenzüklen pai pa indang career statistics indang mejangjai liasü ta shiogo. Tang pai ibaji lepa repringshinütsü.

Arishi küm 35 tain Spain nunger asayar yagi Honibarnü Mexican Open final nung 6-4, 6-4 agi Cameron Norris koka pa indang career nung ATP title 91buba koktetogo. Kasa mapang nung taküm pai asaya ka nung danga tamakok mongui asaya 15 tashi kokogo, koba pa indang career nung season tasen tenzükba mapang asaya timtiba atonga akokba asütsü.

Nadal, shibai 2022 küm Australian Open densema asayamung asem tashi kokogo,

pai Open Era nung championships timtiba akokba asayatem rongnung tasembuba Ivan Lendl asem agi dang memenepi lir. Lendl-i asayamung 94 koka lir aser mezüngbuba aser tanabuba jenjang nung Jimmy Connors (109) aser Roger Federer (103) na lir.

Nadal-i Acapulco nung asayaba asayamung tang agi pezübenbuba kokogo, kong pa fan temi kanga sakloka lir. Pai iba asayamung ya 2005, 2013 aser 2020 küm kokogo. Norrie-i final masaya tsüingda asaya ti khen danga tamakok mongui asaya liasü aser British nunger teburtem rongnungi Mexican Open akokba mezüngbuba asayar akümtsü atema merangdanga liasü.

Asaya mezüngbuba set game pongbuba nung Nadal-i Norrie indang serve break asü aser pa indang serve break mesüdaktsüi pai iba set minute 51 nung akok.

Tanabuba set nung Nadal-i mezüngbuba game nung Norrie indang serve break asü, ajisüaka Norrie-ia Nadal indang serve break süa tena kasasa aküm. Iba sülen Spain nunger asayar yagi asaya pongububa aser tenetbuba nung Norrie indang serve break süa asaya akok.

Kasa asayamung tarep asaya final nung Feliciano Lopez aser Stefanos Tsitsipas nati 7-5, 6-4 agi Marcelo Arevalo aser Jean-Julien Rojer na kokogo.

Dimapur, Tsüklai/February 27 (TYO) : Forlic Cup tir, Mhasilievi Kuotsu-i sangdong ka ajanga 7buba Forlic Cup (football) March 21 nü nungi Medziphema local ground nung asayatsü renemer aliba sangdongogo.

Forlic Cup ya "Goal for Change" omen nung ajemdaker küm ana nung khen asayar.

Iba asayamung nung ajak

senteper senpet sen lakh 1.3 den Running Trophy agütsütsü. Asayamung nung shilem agitsü jangraba team tem dang iba number; 8837486063 nung t o n g t e p r a t e p t s ü metetdaktsüogo.

Asayamung atema form tem Moon Store Medziphema, S. K Provision, Medziphema aser Bright Printer Chumoukedima nung angutsü.

Tennis asayar Sergiy Ukraine military reserves nung züngoksemogo

London, Tsüklai/February 27 (Agencies): Ukraine nunger tennis Sergiy Stakhovsky-i Honibarnü ashiba agi, Russia nungertem den raratsü atema pa par linük indang military reserves nung züngoksemogo.

Arishi küm 36 tain Stakhovsky, shiba mapang ka nungbo alima nung tennis asayatem rongnung jenjang 31buba liasü aser shiba Wimbledon Centre Court nung Roger Federer koka kanga nungtugu aküm, pai kinungtsü aser par chir kecha timtem makai Hungary tonga aoba sülen linük atema mulungsoa raratsü, ta ashi.

"Hau ni raratsü aser ibayongji ni meyipa oner," ta pai Sky News dang ashi.

"Ni taoba hopta reserves nung züngoksemogo. Ni military

dak sendakba nung tajangshiba mali, ajisüaka ni prangbong amshitsübo meteta lir.

"Kübo aser künu na surgeon lir aser tenaprongla kanga belematokogo, saka ni parnok den maneni jembidar. Parnok basement nung mejanger," ta pai ashi.

Kasa mapang nung Ukraine tsür tennis asayar Dayana Yastremkska-i ashiba agi, la aser lar kibong Odessa nung aonung ana tashi ali telung nung tejenokda mejanga liasü.

"Aonung ana ali telung nung gari anendak ka nung mejangba sülen ozü tsürapuri künu küna Ukraine nungi kechi südir süaka anintsü atema telemtetba agi. Oja, Oba künatü nüna kanga meimer !!! Ni ozü linük meimer," ta taoba mapang top 25 asayar yagi Instagram nung zülutsü.

Küm 24 sülen Australia cricket team Pakistan tongogo

Tsüklai/February 27, 2022 (Agencies): Küm 24 sülen tang mezüngbuba Pakistan litsü nung asayatsü atema shimba Australia team nungi asayar 18 agi kümetba squad ka Deobarn anepdang Islamabad tongogo.

Australia team tatemsa Pakistan nung 1998 küm asaya liasü. Iba mapang parnoki Test asaya 1-0 agi akok aser one-day internationals asaya asemprongla koka liasü.

Vice-captain Steve Smith, Islamabad nung asüsang Usman Khawaja aser spinners Ashton Agar aser Mitchell Swepson nunger ajaki Hokolbarnü nungi tenzüktsü aliba Test asaya asem atema yongya ataba lemsatopogo.

Iba asayamung ya Pat Cummins atema captain ama bendanglen mezüngbuba Test asaya asütsü aser iba den Justin Langer-i coach mapa toktsüba sülen lenisüba tasen nung Australia team atema mezüngbuba asayamung asütsü.

Test series atema Andrew McDonald interim coach asütsü shimogo, koba Karachi nung mezüngbuba asayatsü aser tanabuba aser tasembuba Lahore nung asayatsü. Kasa mapang nung ODI asem aser T20I ka Rawalpindi nung asayatsü renema lir.

2009 küm Lahore nung

Islamist telungpurtemi Sri Lanka team bus maka police trok aser civilian ana tepsetba sülen international team temi Pakistan mesemdangi aruogo. Iba ajanga Pakistan national team küm trok tashi home match tem bendanglen oa asayatsüsa aküm.

Taoba küm New Zealand team-i security dak sendakba nung tetsübu aliba ajanga Rawalpindi nung mezüngbuba one-day international asayatsü lia masayatsü telemtetba agia liasü. Iba sülen England team-ia October ita T20 World Cup masaya tsüingda Pakistan nung asayatsü aliba asayamung thija liasü.

Ajisüaka New Zealand team-i taoba küm asayamung thitsüba melena 2023 küm April ita white-ball asaya 10 Pakistan nung asayatsü atema telemtetba agiogo.

Squad : Pakistan: Babar Azam (c), Mohammad Rizwan (vc), Abdullah Shafique, Azhar Ali, Faheem Ashraf, Fawad Alam, Haris Rauf, Hasan Ali, Imam-ul-Haq, Nauman Ali, Sajid Khan, Saud Shakeel, Shaheen Shah Afridi, Shan Masood, Zahid Mahmood. Reserves: Naseem Shah, Sarfaraz Ahmed, Mohammad Haris.

Australia Test squad: Pat


Cummins (c), Ashton Agar, Scott Boland, Alex Carey, Cameron Green, Marcus Harris, Josh Hazlewood, Travis Head, Josh Inglis, Usman Khawaja, Marnus Labuschagne, Nathan Lyon, Mitchell Marsh, Steve Smith (vc), Mitchell Starc, Mark Steketee, Mitchell Swepson, David Warner. On standby: Sean Abbott, Brendan Doggett, Nic Maddinson, Matthew Renshaw.

Australia ODI aser T20 squad: Aaron Finch (c), Sean Abbott, Ashton Agar, Jason Behrendorff, Alex Carey, Nathan Ellis, Cameron Green, Travis Head, Josh Inglis, Marnus Labuschagne, Mitchell Marsh, Ben McDermott, Kane Richardson, Steve Smith, Marcus Stoinis, Adam Zampa.

Asaya mapanglem:

- * 4-8 March - 1st Test, Rawalpindi
- * 12-16 March - 2nd Test, Karachi
- * 21-25 March - 3rd Test, Lahore
- * 29 March - 1st ODI, Rawalpindi
- * 31 March - 2nd ODI, Rawalpindi
- * 2 April - 3rd ODI, Rawalpindi
- * 5 April - one-off T20I, Rawalpindi

Leeds United-i manager Bielsa mapa nungi anentsü



jenjang 16buba nung lir. "Marcelo-i club atema ajanzüktsüba repringdangra Leeds United nung inyakba mapang kü atema iba telemtetba agitsü ya tasaktiba liasü," ta Leeds mendenbuba Andrea Radrizzani-i ashi.

Bielsa lenisüba nung club Premier League-i tanaben aitba sülen pa Leads nung kanga nungtugu aküm.

"Pai club sobaliba meleshitsü aser takoker ka kumdaktsü. 2019/20 season nung takok tulu ngua Premier League-i tanaben aitsüsa asayatetba ya ni aser fan temi teti bilemtettsü," ta Radrizzani-i ashi.

"Ajisüaka club ajanzüktsü atema ni jenjang agiogo aser Premier League nung maneni asayatsü atema temelenshi nungdaker ta bilemer. Tawa asayaba yimya aser result agi onok temulung masür," ta paise ashi.

Leeds-isa, parnoki Elland Road stadium nung Bielsa atema "permanent tribute" ka asoshi sentong yangludat, ta ashi.

Parnoki Bielsa melena shimba manager Hombarnü sangdongtsü sentong lir.

Tsüklai/February 27, 2022 (Agencies): Kidang Tottenham Hotspur goal 4-0 agi makokba sülen Leeds United-i parnok indang Argentina nunger manager Marcelo Bielsa Deobarnü mapa nungi anentsüogo.

Bielsa ya 2018 küm Leeds manager asütsü shim aser pa lenisüba nung club küm 16 sülen top flight-i ai, aser taoba season jenjang tekububa nung tambanga liasü.

Spurs makokba ya club atema asaya pezübuba atonga makokba liasü aser item asayatem nung parnok goal 17 achi. Parnok dang relegation zone-i point ana agi dang mai

BILEMDANGANG

"Rara ajanga takoker aser tamakoker ajak akoksar."